



N°1968
Entrée le 24.02.2025
Chambre des Députés
Déclarée recevable
Président de la Chambre des Députés
(s.) Claude Wiseler
Luxembourg, le 25.02.2025
Chambre des Députés

Claude WISELER
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 24/02/2025

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un d'Ministesch fir Mobilitéit an Ëffentlech Aarbechten weiderzeleeden.

Aus rezenten Artikelen ass ervirgaangen, datt verschidde Gemenge weiderhi Primme fir de Kaf vu Vëloen ginn, obwuel et op nationalem Niveau Aschränkunge bei de staatleche Subventiounen gëtt. Dës ënnerschiddlech Approche féieren zu Diskrepanzen an der Fërderung vum Vëlosgebrauch tëscht de Gemengen.

An deem Zesammenhang wëllt ech der Ministesch dës Froe stellen:

1. Wéi eng konkret Moossnamen ënnerhëlt de Ministère fir eng méi kohärent an eenheetlech Ëmsetzung vun de Vëlosprimmen op Gemengenniveau ze erreechen?
2. Wéi kënnen d'Bierger besser iwwer hir Méiglechkeete fir Ënnerstëtzung beim Vëloskaf an hirer Gemeng informéiert ginn?
3. Gëtt et Pläng fir eng Evaluatioun vun der Effektivitéit vun de verschiddene kommunale Fërderprogrammen op de Vëlosgebrauch?
4. Wéi kann de Ministère d'Gemengen am beschte bei hiren Efforten ënnerstëtze fir de Vëlosgebrauch op lokalem Niveau ze fërderen?

Mat déiwem Respekt,

CLEMENT Sven
Deputéierten



www.piraten.lu



LE GOUVERNEMENT
DU GRAND-DUCHÉ DE LUXEMBOURG
Ministère de la Mobilité
et des Travaux publics

Gemeinsam Äntwert vun der Ministesch fir Mobilitéit an ëffentlech Aarbechten an dem Minister fir Ëmwelt, Klima a Biodiversitéit op d'parlamentaresch Fro n° 1968 vum 24. Februar 2025 vum Här Deputéierte Sven Clement.

Den honorabelen Deputéierte freet a senger parlamentarescher Fro no der Positioun vun der Regierung bezüglech den ënnerschiddleche Primme vun de Gemenge beim Kaf vu Vëloen.

De Klimapakt encouragéiert d'Gemengen ënnert der Mesure 6.5.3 hir Bierger bei der Ëmsetzung vun hire Projeten am Klima- an Energieberäich duerch kommunal Bähëllefene ze ënnerstëtzen. D'Festleeung vu kommunale Primmen fällt awer ënnert d'Kompetenz vun de Gemengen. Dass hei ënnerschiddlech Primme beim Kaf vu Vëloen ausgeschott ginn ass eng Konsequenz vun der Gemengenautonomie.

De Bähëllef-Simulator vun der Klima-Agence regroupéiert all d'Klimabonus-Mesuren, wéi och d'Primme vun de Gemengen an de Fournisseuren a gëtt a regelméissegem Ofstänn aktualiséiert: aides.klima-agence.lu.

Zousätzlech zu de Primmen, fir de Gebrauch vum Vëlo op lokalem Niveau ze fërderen ass et wichteg, dass de Staat zesumme mat de Gemenge weiderhin intensiv un engem duerchgoende Vëlosreseau schafft. De Staat huet sech hei e klore Programm ginn an en encouragéiert d'Gemengen duerch e Kofinanzement vun 30 % lokal Vëlosraccordementer un den nationale Vëlosreseau ze realiséieren.

Weiderhin ass et wichteg, dass d'Vëlosinfrastruktur sécher ass. De Ministère fir Mobilitéit an ëffentlech Aarbechten huet dofir eng Rei Planungsinstrumenter a Recommandatioune fir d'Gemengen ausgeschafft. Hei ass éischters den Internetsite www.veloplengen.lu ze erwäen wou eng Gemeng sech kann informéieren iwwert d'"règle de l'art" vun der Planung vun enger Vëlosinfrastruktur. Dann nach 2 weider Usammlunge vu Richtlinnen op den Internetsite www.apaisement.lu a www.parken.lu, déi ënner anerem Recommandatioune beinhalten wéi een en Duerfkär méi qualitativ héichwäerteg ka gestalten duerch Verkéiers-Berouegungsmoossnamen. De Staat bitt och INAP-Formatiounen fir Gemengebeamten zu dësen Themen un.

Lëtzebuerg, de 26. Mäerz 2025

Ministesch fir Mobilitéit an ëffentlech Aarbechten

(s.) Yuriko Backes

